

精鈔
大字

隨

園

全

集

隨

筆

三

欽定四庫全書

隨園隨筆卷九

官職類下

錢唐袁枚子才著

宰相乞郡

宋宰相出知一府一州。非貶降也。所以均勞逸也。以某官出知者。猶今之學政。或以侍郎爲之。或以編修主事爲之。其官大小不同。其任學政則一。

明參將遊擊非守土官

前明之參將遊擊。皆欽差官。與督撫同。非守土官也。守土官惟布按兩司與都指揮。都指揮者。今之都司也。

寄祿散官

宋初官制。有寄祿之稱。漢唐未有所謂寄祿者。如尚書侍郎。給事。諫議。諸卿監。郎中。員外郎。丞。屬。皆有其名。而不任其職。謂之寄祿官。以爲叙遷之階而已。所謂散官者。則勳封功臣。食邑之類。徒爲文具。無足重輕者也。元豐以後。又以尚書侍郎等皆爲職事官。而以舊所置散官爲寄祿官。如金紫光祿大夫。猶前之吏部尚書也。銀青光祿大夫。猶前之五部尚書也。正議大夫。猶前之六部侍郎也。朝請大夫。朝奉大夫。猶前之諸曹員外郎也。皆寄其本銜之錄。而遷轉予奪之。與外官之俸無與也。東坡以工部員外郎知湖州。罷官後。又以朝奉郎知惠

州知惠州湖州者其現任而員外郎朝奉郎則其寄祿也

公卿三變而稱寺稱少

隸續曰漢百官志太傅上公一人太尉一人居三九之官者均不加以公卿之字以公卿名其官自蕭梁始余按六朝以前無稱司徒公太僕卿者此一變也然只稱太僕卿鴻臚卿不兼稱衙門也至明朝乃有太僕寺卿鴻臚寺卿之稱是兼帶其衙門稱之又一變也今俗稱又有太僕寺正卿鴻臚寺正卿之稱以自別于少卿是三變也

宋有就差勾當之稱

曹武惠王平江南歸赴宮門只稱勾當某事已畢人嘉其不伐蓋爾時稱勾當者即今之幹辦也余見宋縉雲縣城隍廟碑後題名一稱文林郎就差權處州縉雲縣尉一稱迪功郎就差縉雲縣令管勾勸農公事又一稱將仕郎縉雲縣丞某而已其不稱就差者是本職官也其既書就差又加一權字者是資格之最輕者也大抵宋元人書官銜最繁不似今之省也古人階秩之尊卑與其現任官不必配合不似今之文林郎七品知縣亦七品也

選法三變而至制書簽

儲六雅先生云漢晉間重高書選部黃散以下皆得銓注然至北魏崔亮之停年格而選法一變至唐裴行儉之長名榜而選法再變至明孫丕揚富平人行掣簽法而選法又一變

古調官非今調官

漢書十年不調頗師古注調選也蓋陞遷也今之調簡漢人謂之換薛宣傳以平陵之薛恭換鉅鹿之尹賞是也

判官非通判

凡唐宋稱爲某府判官者幕府之官非通判也崔璞守蘇州辟皮日休爲軍事判官是也通判有監州之責其權大如狀元蔡齊除將作監通判交州是也

特進非官

鄧禹拜右將軍後左右二將軍罷乃以特進奉朝請特進者特異乎衆而許其進見之稱非官名也

巖郎非尚書郎

漢羽林中郎將用六郡良家子孫補以便馬從獵還宿殿陛巖下室中故號巖郎是巖郎者武職之稱非郎官也荀綽百官表注云巖者取其嚴肅整銳之義若然則曰巖郎亦可

賜爵

史記趙孝成王使趙勝受韓使者馮亭之地吏民皆益爵三級惠帝元年民有罪得爵三十級免死應邵曰一級直錢二千大事記載普賜天下民爵自惠帝始後漢書注劉邵曰春秋不更庶長已見商鞅修其法爲十八級合關內侯凡二十等百官表一級曰公士二曰上造

三曰贊晨四曰不更五曰大夫至關內侯而止有罪者得贖貧者得賣與人高祖詔吏善遇高爵明于文定公不解其制以爲屢違章恩天下將無百姓方密之以爲所賜者不過鄉老里長輩雖曰民非平民也唐劉知幾言具僚九品每歲遇赦必賜勛階以致緋服多于青衣衆版多于木笏此庶官加爵而不及平民之証也宣帝求漢初功臣之後復其家史稱皆出庸保之中及考之表則或云公乘贊晨或曰公乘上造大率皆有爵者爵至五大夫才得復其身庶長左更則二十石之勤事者往往得賜皆漢法也王仲宣集有爵論云依律有奪爵法令爵事廢矣奪之民不懼賜之民不喜是空設文書而無用也又曰爵自一級轉登十級而爲列侯譬猶秩官百石轉遷而至於公也近世賞人不由筭級從無爵人封爲列侯原其所以爵廢故也古者自起衛鞅皆稍進爵爲五大夫客卿庶長以至於侯非一頓而封也魏了翁古今考曰漢武功爵者造士良士戍士樂卿軍衛之名與秦異賈者試補吏先除千夫如五大夫猶近世廸功郎登仕郎之類各有價也宋天禧元年登州學究鄭巽出粟五千六百石賑飢詔補三班承信郎嗣後沿以爲例然州縣官不許接生只令廷參而已大抵民賜爵如今老農給八品頂帶之類官賜爵如給本身封典之類俱不甚貴重

漢俸米多錢少

漢百官俸米多錢少三公俸月三百五十石減至令史而月猶八石開元二十四年定百官

俸一品月三十千。遞至九品月一千九百。此則論錢矣。北漢劉崇傳宰相月俸百緡。較之今日猶多一倍。鄭端簡曰。祿輕自宋始也。惟貤封之典。至宋而隆。大父如父母。古未曾有。

予告賜告有別

漢子告賜告有別。予告者。許歸家三公子告令也。賜告者。不得歸家。病滿三月。賜告恩也。大抵賜告如病假之類。馮野王病滿三月。賜告與妻子歸茂陵就醫。大將軍王鳳劾其不敬。持節使持節假節有別。

漢之持節有三。曰使持節。得殺二千石以下。曰持節。得殺無位人。曰假節。惟行軍得犯令者。皆刺史也。唐武德元年。改郡為州。改太守為刺史。亦加號持節。

舍人

顏師古曰。舍人者。供役使之人。史記嫪毐幸時。諸客求為舍人者以十數。李斯亦為呂不韋舍人。蓋親近左右之通稱也。至六朝而權傾天下。茹法亮以舍人出為司農而泣。

給扶俠侍之分

常見岑文本畫古帝王像。一帝之側必有左右二人。擁侍而立者。亦復冕而貂蟬。但止三旒。非若天子之九旒。不解其制。朱萬同曰。此魏晉六朝所謂給扶是也。宋猶行之。故陳康伯傳許肩輿至殿門。仍給扶。或曰。天子無給扶之說。旁侍立者。即侍中也。故戴貂蟬。余按陳書。驍

騎之職。天子臨軒則升殿使侍。韋翻為使侍將軍。又大行皇帝靈座有使御人。或岑所書者。其即此歟。

衙門當作吾門

說文衙字讀語音。不作牙音。故漢碑多寫衙為禦。楚詞道飛廉之衙衙亦然。漢吾字乃作牙音。如允吾騶吾金吾之類。百官箴以金吾為吾臣。蓋衙臣也。天子朝羣臣曰正衙。庭見曰衙。參走卒曰衙官。牙將皆從木吾而起。金吾木吾者棒也。伍百執之以參于前者。見古今註。

上衙門三日

今州縣初到任。必具刺上衙門三日。在上官到任。則下屬亦往。具刺候起居。三日不解所自始。唐岑參為號州上佐。有衙郡守還一詩。自註衙者。今監司郡守初上事。既受官吏參謁。至晡時僚屬復伺于客次。胥立廷下。通刺曰衙。以聽進退之命。如是者三日。如主人免此禮。則翌旦又通謝刺。蓋自唐已然矣。

三考出身

三考者。試流外之官。一曰書。二曰計。三曰時務。蓋較之試進士科之身言書判。僅少其一耳。見大典元史選舉志。吏三考者。或以三十月為一考。或以四十月為一考。大德元年。以百二十月為一考。蓋舊以九十月為滿也。三考出身為正七品。

大夫亦有三朝

古今考曰天子有五門三朝三朝者內朝路朝外朝也王藻曰路寢聽政退適小寢路寢者大寢也正寢也此云諸侯亦有三朝也今之州縣大廳正寢也小廳小寢也別府堂宅燕寢也是大夫亦有三朝也

歷代職官數目

漢官制七十五百員唐萬八千員宋三萬四千員前明成化五年武職已逾八萬合文職十萬餘員見明史劉體乾傳中

典史授都御史

明初典史授都御史貢士授布政使秀才授尚書見明史姜採傳陳啟新疏中

印

璽書二字見左傳季武子以璽書追而與之周禮司關凡達貨賄者以璽節傳出之璽即印也戰國時已用印蘇秦佩六國相印項羽刻印而不以與人漢高帝弄御史大夫印而顧趙堯其求久矣王伯厚云璽符節甬印始于周顯德六年想符節廢于周耳非印始于周也漢晉官員替代皆別鑄印惟尉只用一印見晉書孔琳之傳琳之請桓元無改鑄印省金炭之費

省會二字借用

省者禁署也。漢昭帝紀帝姊長公主養省中。蔡邕曰本為禁中。避元后父名。故曰省中。師古曰省察也。言入此中者當察視也。唐書百官志曰官司之別曰省曰臺。今稱省會者借用也。唐以中書門下尚書為三省。宋元以中書省為宰相所專治。元末署中書分省於濟甯彰德諸路設叅知政事。又置行中書省於江西江浙山陝等處。添設平章與真相等。明興分天下為十二中書省。未幾改為十三布政司。從此以官署為地名。而有十三省之說。會者天官司會註大計也。聽出入以要會。天官之職也。禹南巡時會計天下賦稅。周公營洛四方民大和會。而後世遂相因為省會之名。

府道二字借用

府文書藏也。非官也。論語魯人為長府。太公立九府圜法。周禮天官府六人尚書六府三事允治。漢有少府樂府皆非官名。趙禹傳文深不可為大府。諸葛亮傳開府治事。方漸漸有官名之意。然亦非州郡名也。唐初只京兆河南二府而已。後武后升并州為大原府。明皇升蒲州為河中府。自唐升大州為府。而地理志始有府州之名。然為建都者稱府。宋真宗嘗為襄王。仁宗嘗為慶國公。故升襄陽慶州為府。至元明而統縣者皆曰府矣。道路也。非官也。自唐分天下郡縣為十道。又增為十五道。而明遂因之。有巡道糧道僉事道兵備道之名。

在家食俸

今優禮大臣。有在家食其原官之俸者。按後漢書鄭均傳。均遷尚書。以病告歸。元和二年。帝東巡。過任城。幸均舍。勅賜尚書祿。以終其身。號白衣尚書。是大臣在家食俸之始。

革職留任

今大臣革去頂戴。仍令在官辦事。按晉書陶侃傳。侃刺荊州。討杜曾。戰敗。免官。王敦表以侃白衣領職。再討杜弢。成功。復還原官。是即今之革職留任矣。唐劉仁軌征百濟。亦白衣從軍。聽事吏。

今州縣有聽事吏。按隋書百官志。開皇時。因州縣之大小。置白直以供役。此即今之聽事吏矣。

頂馬

今貴人街行。前有騎馬者。一二人。號稱頂馬。按國語。越王勾踐親爲吳王前馬。前馬者。即今頂馬矣。

掌扇腰扇

今貴人街行。有持大扇遮太陽者。號掌扇。接通鑑褚淵入朝。以腰扇障日。爲功曹劉祥所譏。方密之。謂腰扇即今之掌扇。余按胡三省註。腰扇。今之摺疊扇也。故可以置之腰間。若掌扇。則是雉尾扇之類。

喝道

今官府行街有呵殿聲謂之喝道按梁書梁制令僕中丞引隍至街引隍即喝道也

需次

左傳敬共朝夕恪居官次東方朔傳待以不次之位荀子賢能不待次而舉注次者官之次序後人訛待爲需故宋史馬廷鸞傳登瀛祜進士調池州教授需次六年朱子答方耕道書亦曰老兄今茲需次當潛心味道

劄付

晉華潭作奏謹奉還所假左丞相軍咨祭酒版版即劄付也鼂錯言里有假士又有假五百即今之劄付官也

督郵

如淳注漢官督郵都吏也似督郵是吏非官然史弼遷山陽太守其妻鉅野薛氏以三互之禁轉拜平原相督郵似乎督郵官卑而權重此淵明所以有折腰之說陶侃爲廬江太守張夔督郵太守妻病侃冒雪爲迎醫于數百里之外或難之侃曰資于事父以事君禮也安有父母疾而不盡心乎督郵似是功曹參軍之流

門卒

東漢庾斐給事縣庭為門士。註門卒也。郭林宗拔之入學。庾自知出身卑。每下坐。嗣後學中人以下坐為尊。

官婢

或問漢官儀。郎署有女侍史二人。貌妖麗者為郎官焚香熨被。未知許伴寢否。余按張安世傳。郎淫官婢。婢先自言。安世責其誣污衣冠。後漢王君公求罷不得。故通官婢以劾去。官乃得歸隱墻東。是漢律但教侍奉不許侍寢也。但未審官婢是何家子女。終嫁何人。或云公卿子女。以罪籍沒入官者是矣。

公主稱尚

稱尚者。本易經得尚於中之義。王弼註尚配也。顏師古匡謬正俗言之甚詳。漢書天子女稱公主。姊妹稱長公主。姑稱大長公主。猶之春秋所書伯姬叔姬季姬者。時君之女也。加主以貴之者。先君之女。時君之姊妹。或姑若祖姑也。但帝女亦有稱長公主者。如武陽公主是也。諸王女稱翁主。唐稱郡主。稱鄉主。公主賜諡始于唐德宗。賜廣安公主諸王女。婿稱儀賓。似始于明。

駙馬

駙馬始于漢武。謂駙御馬而行。親幸之義。非必尚公主也。故金日磾亦拜駙馬都尉。尚公主。

必先拜駙馬都尉。始見于齊職儀。南齊哀樞議公主亡不得兼駙馬都尉。引杜預尚高陵公主亡。泰始中追贈公主。而元凱不加駙馬之官。嬾真子以爲駙馬者始于魏武。寵何晏以御馬之副給之志恩也。宋神宗治平四年詔駙馬不許升行。蓋唐以後子弟一選駙馬便與父叔齊行。李遵勗崇鉅之孫。尚真宗女。御筆升遵勗爲崇鉅之子。繼昌之弟。繼昌者其父也。升之與父同行。所以避舅姑之尊也。其無禮亦甚矣。內府秘典言明代駙馬不選公卿子弟。多用畿輔少年。及武弁世家。所以然者。駙馬受制於公主之嬾母。出入有時起居有節。萬曆再駙馬受嬾母箠幾死。而公主不敢救。已而反目。逃回。罰來演禮華其父職。帝亦悔之。宋史開慶初宰相請以進士第一人尚主。時周震炎中狀元。而主從屏後窺之。不悅其貌。乃別尚楊鎮理宗事也。余道男女相悅爲婚。理宗亦自有理。宋章獻太后爲仁宗選后有王氏者國色也。太后嫌太妖艷不宜少主。乃另選郭后。非仁宗意。卒至廢黜。後王氏所適者死。仁宗傳旨封爲夫人。許入禁中。適當獨作相。格詔不行。見揮麈錄。

隨園隨筆卷十

科第類

錢唐袁枚子才著

進士稱名

唐舉進士科。即自稱進士。不必登科而後稱。及第後。遇未及第時。題名進士。則添一前字於其上。蓋唐時為進士。而不及第者多矣。宋進士有四甲五甲。朱文公乃紹興十八年五甲進士。故王封亭題其題名碑云。若使當年無五甲。先生未免落孫山。朱子小名沈即。亦載碑中。

進士出身

唐人爭取新進士衣裳。以為吉利。故張文昌詩曰。歸去惟將新語命。後來爭取舊衣裳。唐宣宗自稱鄉貢進士。李道隆進士之榮。至於天子慕之。宋時尤重出身。無出身者不得入相。故欲相此人。必先賜同進士出身。而後許其入相。其重如此。然亦有時而賤者。李齊皇不中進士。故不喜科目。曰。好驛馬不入行。金衛紹王喜畧貝。不喜進士。曰。高廷玉人材非不佳。可惜出身不正。以其中進士故也。

糊名印卷排坐位

漢所謂設科射策者。書其所試於策。而投射之。即糊名之濫觴。唐吏部試選人。皆糊名。武后以為非用人之法。詔罷之。此所云糊名者。用之於選人。而非用之於考試也。考試糊名。續通考以為始。

於鸞臺侍郎魏元同。宋淳化三年。蘇易簡知貢舉。仍糊名考校。後遂為例。卷上加印。五代會要。以為始。于晉清泰三年。命諸生試卷。加監試官印。以防真偽。排坐號。宋會要。以為始。於大中祥符四年。令諸位列坐號。號曰混榜。元選舉志。舉人試時。無故不冠。及擅移坐次者。並扶出。每舉子一名。着法薛夕一人看守。大抵防弊之法。至後代而愈嚴。

搜檢改沐浴

搜檢之法。不知何始。然讀舒元興疏云。士子入場。自攜脂燭。聽候唱名。搜檢等語。是搜檢亦始于唐也。杜牧李飛墓志。飛赴試。聞吏唱名。覩視符驗。勃然曰。國家如此待賢耶。士受如此之待。而猶自以為賢耶。遂不試出。所謂符驗。亦搜檢類也。唐肅宗時。中書舍人李揆。請試進士於庭中。設五經諸史。請恣尋檢。曰。迂學陋生。祇枕圖史。亦不能自措于詞。今取士不考實。徒搜禁所挾。甚無謂也。國史補云。挾藏入試。謂之書策。似乎唐時懷挾之禁。猶寬。宋端平元年。御史李鳴復奏。嚴懷挾。請賞募人告捉。余考金史。太和元年。省臣奏搜檢法太嚴。裂衣袒體。殊非待士之禮。請設一沐浴所。命諸生浴。官為製新衣著之。以防夾帶。似此法甚佳。

文章自註出處

金明昌元年。令舉人程文所用。可自註出處。

填籍貫年親三代

宋咸平辛未正言陳伯文議考試士子諸路運司牒州縣先置士籍編排保伍取各人戶貫三代年甲書明所習經書年十五以上實能文者許自召其鄉之貢士結狀保送一樣四本分送縣州漕部臨唱名時重行編排保伍且俾各人親書家狀以為筆迹之驗由是後世士子未入場時先投試卷填寫本身籍貫年貌三代皆親書一通

唐宋進士選官不過簿尉

通典唐舉人條例四經出身授縣尉五經出身授望縣尉是唐時進士初除不過縣尉也然非試吏部得用則終身布衣并不釋褐韓文公所以三選無成而受張建封之辟宋進士選官亦不過主簿程明道中進士為鄆縣主簿令以其年少輕之是也今進士非授庶常即改主事縣令驟貴實始于明

進士許讓

宋薛聞肅初舉進士為州第一讓其里人王嚴而居其次茅鹿門疑進士何得讓不知唐宗凡舉子皆稱進士其中殿試者謂之及第出身宋制解試雖有主文考校而鄉舉里選之意猶存故得讓此說見南雷文定

給燭

唐制試日許燒燭二條管長興二年改令晝試晝員固請復給燭